



宮闈典第六十八卷

東宮部彙考十二

明三

憲宗成化七年立皇子祐極爲皇太子 按大政紀成化七年十一月立皇子祐極爲皇太子祐極萬貴妃所生 按明外史悼恭太子傳憲宗十三子第二子孝宗悼恭太子祐極憲宗長子母柏賢妃成化七年立爲皇太子是年冬彗星見東方未幾太子薨

成化十一年冊立皇子祐檣爲皇太子 按大政紀成化十一年五月上命皇子至文華門召文武大臣進見數日上御文華殿召商輅萬安劉翊劉吉至座前問曰皇子旣出將何如處之輅等對曰皇上卽位十年儲副未定天下人心屬望久矣當立爲太子上曰卽舉行乎對曰今天氣尙炎俟秋涼舉行上曰然輅復曰皇子饑飽寒暖之節須勞聖慮上頷之曰已命太監懷恩覃昌侍矣輅等退賜酒飯於文華門外命太監懷恩覃昌侍之九月文武羣臣上表請立皇太子禮部上冊立皇太子儀注十一月癸丑冊立皇太子詔告天下 按名山藏典謨記孝宗敬皇帝諱祐檣憲宗子也母

曰紀淑妃憲宗王皇后無子萬貴妃寵而妬他妃不得子淑妃一幸上爲萬貴妃所譖逐既有身及生上周皇太后王皇后私育之而不敢以聞及六歲憲宗方知有上卽冊立爲皇太子憲宗崩以其年九月壬寅卽位

按明會典凡冊立東宮成化十一年賜親王一等銀二百兩紵絲八匹紗八匹羅八匹錦四段生熟絹十六匹高麗布十匹白毯絲布十匹西洋布十四匹二等銀一百兩紵絲六匹紗六匹羅六匹錦四段生熟絹十二匹高麗布六匹白毯絲布六匹西洋布六匹

孝宗弘治五年三月冊立皇長子厚熜爲皇太子大赦天下 按大政紀云云 按名山藏典謨

記武宗毅皇帝諱厚熜孝宗嫡長子也生二歲立爲太子稍長英敏好騎射孝宗大漸召大學士劉健李東陽謝遷楊前執健手以託孝宗崩上以五月壬寅卽皇帝位大赦詔天下

弘治十一年更定東宮講學儀 按明會典弘治十一年定是日早內侍設書案於文華殿內東禮部鴻臚寺執事官於後殿行四拜禮畢鴻臚寺官請皇太子陞文華殿導引至殿陞座三師三少并宮僚以次序於丹陛上行四拜禮畢從殿左右門入分班東西立通事舍人以書案進內侍展書侍讀官進讀讀畢侍講官進講講畢通事舍人徹案各官叩頭退每日講讀常儀與天順年同

世宗嘉靖十二年贈皇子載堽爲哀冲太子 按名山藏繼體記哀冲太子載堽肅皇帝長子也母

曰閭麗嬪上卽位十二年始得之旣越月當名諭禮部尙書夏言曰皇子命名有勅諭故事也夫尙不省賜之勅虛文矣朕欲待其知事乃教識之又禮曰父命名朕欲先告祖考焉夏言言臣讀內則篇姆先相曰母某敢用時日祇見孺子夫對曰欽有帥父執子右手咳而名之妻對曰記有成此夫婦對語非命子詞陛下曰不降勅甚善請擬定告廟命名制以備一代典禮上如言議越月皇子薨勅曰朕荷天眷予丈夫子雖卽云亡然嘗告之皇天皇祖詔示中外將冊命之矣重傷聖母之心深切朕懷之悼其諡之曰哀冲太子

世宗嘉靖十八年冊立次子載堽爲皇太子重定冊立及賜齋監國之儀 按大政紀嘉靖十八年二月辛丑帝以南巡在邇乃冊立次子載堽爲皇太子 按明外史莊敬太子傳莊敬太子載堽

世宗第二子母王貴妃嘉靖十八年帝將南巡立爲皇太子年甫四歲令監國以大學士夏言爲傳尙書霍韜郎中鄒守益獻東宮聖學圖疑爲謗訕幾獲罪帝旣得方士段朝用思習修攝術諭禮部具皇太子監國儀太僕卿楊最爭之逮繫瘐死監國之議亦罷贊善羅洪先趙時春唐順之請太子

出閣講學文華殿見羣臣皆削籍太廟成命太子攝祀二十八年行冠禮是日風壞泰折坊越二日薨泰與太同未婚而死曰折殆其應云帝命與哀冲太子並建寢園歲時祭祀從諸陵後 按明

會典嘉靖十八年續定前期三日齋戒至日上躬詣南郊以冊立皇太子奏告皇天上帝駕回恭詣太廟告聞皇祖命大臣祭告北郊列聖宗廟太社稷帝社稷朝日夕月天神地祇行事俱用祭服太常寺辦祭品通用酒果脯醢三獻上帝皇祇加一牛翰林院撰告文圖丘祭告文武陪祀官各具祭服陪拜百官各具吉服并耆老生儒俱於昭亨門外陪拜其分遣祭告北郊等官俱詣圖丘陪拜畢方各詣祭所宗廟祭告文官五品以上武官四品以上皇親指揮等官六科都給事中俱照例具服陪拜郊廟祭告畢上具常服以冊立告聞於母后前期鴻臚寺設節冊寶案於奉天殿中節冊東寶西設冊寶綵輿於丹陛之東教坊司設中和韶樂及太樂如常儀內使設節案於文華殿正中設冊寶案於節案前設香案於冊寶案前設皇太子拜位於香案前至日錦衣衛設大駕鹵簿百官各具朝服入丹墀內侍立上具冕服御華蓋殿鴻臚寺官引執事官進至華蓋殿就次行五拜三叩頭禮贊各供事鴻臚寺官奏請陞殿樂作導駕官前導上陞座樂止鳴鞭報時雞唱定時鼓訖唱排班

文武百官及生儒耆老人等入班鴻臚寺官贊四拜樂作興樂止左右侍班引禮引正副使入就拜位贊四拜傳制官跪奏傳制俯伏興執事官舉節冊寶案由殿左門出置御道中傳制官由左門出稱有制贊跪正副使跪傳制官宣制曰嘉靖十八年二月初一日冊立元子某爲皇太子命卿等持節行禮贊俯伏興又四拜禮畢執事官舉節冊寶置於綵輿中黃蓋遮送教坊司鼓樂前導至文華殿正副使由中門入至丹陛下停止保母奉皇太子迎於文華殿門內正副使各捧節冊寶置於案節中冊東寶西內贊導保母奉皇太子就拜位贊四拜保母奉皇太子拜興贊宣冊贊跪保母奉皇太子跪鴻臚寺宣冊官取冊立宣於皇太子之左宣訖贊受冊捧冊官以冊授皇太子內侍官跪代受以冊授捧冊官置於冊案贊宣寶鴻臚寺宣寶官取寶立宣於皇太子之右宣訖贊受寶捧寶官以寶授皇太子內侍官跪代受以寶授捧寶官置於寶案贊俯伏興保母奉皇太子興贊四拜保母奉皇太子拜興禮畢正副使捧節由正門出於奉天門具本復命冊立之明日上恭詣宗廟捧德祖神主各廟捧主大臣捧列聖神主奉安畢上具常服率皇后貴妃各具禮服保母奉皇太子恭行告謝三獻如常儀畢上具常服詣母后謁謝皇后率貴妃各具禮服保母奉皇太子詣上前皇后貴妃

俱代皇太子行八拜禮貴妃又代皇太子詣皇后前行八拜禮保姆又代皇太子詣貴妃前行四拜禮上行告謝禮畢御奉天殿頒詔天下如常儀遣官齎捧御書禮物往各王府報知及詔諭朝鮮國是日文武百官上表行慶賀禮仍上表賀皇太后命婦入內賀皇后俱如常儀百官又以是日進箋賀皇太子鴻臚寺官預設案於文華門班首捧箋置於案行叩頭禮畢司禮監官捧進 又按嘉靖十八年冊立東宮賜親王一等銀三百兩紵絲十匹紗十匹羅十匹錦四段生熟絹三十匹高麗布十匹白毯絲布十匹西洋布十匹二等銀二百兩紵絲八匹紗八匹羅八匹錦四段生熟絹十六匹高麗布六匹白毯絲布六匹西洋布六匹三等銀一百兩紵絲六匹羅六匹錦四段生熟絹十二匹高麗布六匹白毯絲布六匹西洋布六匹

又按嘉靖十八年時駕南巡定東宮監國之儀

一東宮朝駕儀仗等件勅內府各該衙門先行

造辦

一請勅欽命輔臣一員居守京師保護皇儲一應軍國機務悉聽啟行

一在京文武

衙門遇有內外軍機各王府緊要重大軍務悉奏請處分其有各處啟報聲息卽調邊軍勦捕仍遣人馳赴行在所奏聞 一皇城四門京城九門比常皆增撥官軍守護留守武職大臣同參贊尙

書仍每日操閱軍馬各衙門稱奉令旨調遣官軍及處分事務所司須覆敢施行 一五府九卿

各衙門凡有緊要重事俱達行在所奏聞其每月進繳精微監生考勤宴賞鈔錠官軍捧糧及五府

比試等項俱照常啟行 一祭祀凡遇忌辰陵祭各常典祭至期太常寺啟請取令旨遣官行禮

郊廟社稷之祭候勅命行 一各處拜進表箋特賀大禮不係常典者原差人恭詣行在所投進

其進賀中宮東宮箋文俱在京禮部類收司禮監官捧進 一各王府進慈孝獻皇后香并南京

進香官朝鮮國弔使禮部啟請命司禮監官捧進凡筵照例給賞綵段鈔錠 一吏部會推在京

堂上官六科都給事中在外方面官知府俱行在吏部奏請擢用其大選急選并取選遠方監生及

考滿復職等項俱循例啟行 一各王府請給誥命勳臣襲爵歿後追封兩京堂上官贈諡公侯

伯內外文職官員請給誥勅兩京三品以上官廕子各處土官襲職俱行在吏部奏行其官吏人等

丁憂查放起復官員付選查題散官等項俱照常啟行 一兵部推補兩京五府錦衣衛在外總

兵叅將各都司掌印僉書俱奏請擢用其大選軍職查黃績黃官舍襲替優給土官襲替及保用通

事把事隨司辦事長官等項俱具啟裁度 一各處奏報邊功應該覈勘及勘明應該陞賞等項

俱啟請行

一在外撫按官劾奏不職文武官文官方面以上武官參將以上奏聞待報

一

京衛軍士冬夏布絹及邊衛軍士冬衣布花襖但係年例給賞等項錢糧該衙門啟請行

一在

京各邊鎮遇有緊急調用馬匹啟請調取兌用

一在京各衙門赴行在奏事人俱兵部啟請給

關應付

一各王府奏訴重情辯復爵位祿米者俱詣行在所奏聞其請名請封請婚等項在京

具啟行

一天下歲貢生員到部者該部查照事例啟行

一四夷朝貢人員到京一應賞宴

該部照例啟行

一法司問擬罪犯除重囚奏請待報其餘悉具啟決放勅諭審錄矜疑罪囚例

該覆題及京官軍職犯人例該參提俱奏請定奪

一刑名凡內外大小官員有犯具啟准問者

問之若所犯情重該衙門具由奏請待報

一都察院點差各處巡按御史具奏行在餘差及考

察公差回道御史俱啟行中間有推姦避事贓濫不職者具奏

一通政司每日收過奏題本照

常封進下科發抄各衙門啟行其有疑碍難行者差人赴行在取旨

一大理寺審錄罪囚詳擬

罪名千係生殺并提問大小京官具奏其每月繳刑部都察院問過囚犯奏本照常啟行俱送科備

照

穆宗隆慶元年贈長子翊鉞爲憲懷太子 按大政紀云云 按明外史憲懷太子傳穆宗四子

第三子神宗憲懷太子翊鉞穆宗長子母慈聖太后生五歲薨贈裕世子隆慶元年追諡

隆慶二年三月立皇子翊鈞爲皇太子更定賜賚及受朝之制 按大政紀隆慶元年正月禮部請

立皇太子上曰皇子尙幼且先賜名徐議冊立二年正月禮部尙書高儀等覆上疏請立東宮以宣德成化弘治間冊皇子皆二齡六齡事例爲據上乃命擇日具儀以聞三月辛酉上御皇極殿傳立皇子爲太子 按明通紀隆慶元年正月禮部尙書高儀請冊立皇太子上諭皇子尙幼先用名

而後冊立二年正月張居正高儀等復請立東宮命擇日具儀以聞三月冊立皇太子無何太子遇

閣臣於御道西召謂曰先生良苦翊贊閣臣頓首謝曰願殿下勤學答曰方讀三字經旣而曰先生

且休矣睿音清粹步履幽閑舉朝稱慶以爲後日之太平天子也六年五月上不豫二十五日召閣

臣高拱張居正高儀至乾清宮受顧命上倚坐御榻后及皇貴妃咸侍東宮立於左拱等跪於御榻

下命宣顧命曰朕嗣祖宗大統六年偶得此疾遂不能起有負先帝付託東宮幼小朕今付之卿等

宜協心輔佐遵守祖訓保固皇圖卿等功在社稷萬世不泯拱等咸痛哭叩首而出翌日上崩於乾

清宮六月皇太子卽皇帝位時年十齡

按明會典隆慶二年冊立東宮賜親王各銀三百兩紵

絲八匹紗八匹羅八匹錦四段生熟絹十六匹高麗布六匹白氎絲布六匹西洋布六匹管理親王府事者與靖江王各銀一百兩紵絲六匹羅六匹錦四段生熟絹十二匹布同前

又按隆慶二

年冊立皇太子詔於文華殿門東間設座受羣臣朝賀百官於文華門外列班

隆慶六年增定東宮講學儀

按明會典隆慶六年增定是日早侍衛侍儀如常儀內侍先設皇太

子座於文華殿之東廂房正中西向設書案於座之左禮部鴻臚寺執事官候皇太子出閣導引至東廂房陞座提調輔臣并侍班講讀等官以次序立丹墀行四拜禮畢各官以次入東廂房分班相向立鴻臚寺官贊起案通事舍人以講案進內侍展書侍讀官進讀讀畢侍講官進講講畢通事舍人徹案命賜酒飯各官叩頭而退每日講讀儀與天順年所定同但每日各官先詣文華門外東西向序立候皇上御日講經筵畢皇太子出閣陞座又題准東宮初講之時閣臣連侍五日以後仍於每月三八日一至先行叩頭而出然後各官進入供事

神宗萬曆二十九年冊立元子常洛爲皇太子

按明通紀萬曆十四年二月輔臣申時行等請冊

立東宮疏曰竊惟國本係於元良主器莫若長子故漢臣有云早建太子所以尊宗廟重社稷也仰惟皇上受天眷命繼祖洪圖德澤浹於寰區嘉祥鍾於後嗣自萬曆十年元子誕生詔告天下五年於茲矣卽今麟趾螽斯方興未艾正名定分宜在於茲查得祖宗朝故事宣宗以宣德三年立英宗爲皇太子時年二歲憲宗以成化十一年立孝宗爲皇太子時年六歲孝宗以弘治五年立武宗爲皇太子尙未周歲也蓋冢嗣升儲所以明震器之重冲年貽哲所以端蒙養之功成憲具存昭然可考今元子聰明克類岐嶷夙成中外臣民屬心已久及茲睿齡漸長陽德方亨用立禮儀允宜修舉伏望皇上祇率祖宗之舊典深惟國家之大計以今春月吉旦勅下禮部早建儲貳以慰億兆人之望以固千萬世之基至於出閣講學及朝賀等儀稍俟一二年後睿體充實次第上請伏惟聖明裁斷施行天下幸甚十五年閣臣申時行等恭請宸斷並舉建儲封王吉典疏曰昨年言事諸臣屢請建儲道路流傳妄有窺測臣等心竊非之以爲皇上親灑宸翰諭示臣等明旨昭然布告四方聖志何常不定而乃設不然之慮爲此紛紛以故逡巡待命踰年於茲矣及自新歲以來則臣等亦有不
容已於言者蓋聞自古帝王或遇天象有警民生可虞則必深思遠圖多舉吉祥善事以慰悅羣情

導迎和氣臣等仰稽星象俯察輿情竊謂今日吉祥善事無如建儲闡封王爵以正綱常明典禮敷恩澤庶幾人心咸悅天意自孚而言者尙未之及也臣等請畢陳其說夫國家有大綱常若父子兄弟倫序一定而不可易者是已有大典禮若建儲封王彝章具在而不可廢者是已昔我太祖高皇帝三年四月之詔有曰朕聞帝王之子居嫡長者必正儲位其衆子當封以王爵分茅胙土大哉聖謨其爲綱常典禮計至精至備眞萬世聖子神孫所當遵守而不違者伏惟皇長子聰明岐嶷睿質非凡前此誕生之年卽已詔告寰區奏聞郊廟今屆六齡矣天序旣已默定人心又皆翕從此聖祖所謂宜正儲位者也又惟皇第三子祥徵良索序屬宗盟雖未及勝衣趨拜之年亦已有礪山帶河之重此聖祖所謂宜封三爵者也查得本朝故事成祖以永樂二年立仁宗爲皇太子卽封趙王英宗以天順元年立憲宗爲皇太子卽封德崇等王世宗嘉靖十八年東宮二王俱在幼冲亦同日受冊載在寶錄歷歷可考臣等繹思列聖傳家世守之法仰體皇上愛子均一之情竊謂皇長子宜正位東宮皇第三子宜卽分封大國一時並舉尤爲盛事詩曰文王孫子本支百世又曰穆穆皇皇宜君宜王蓋言成周之盛也今也邇有歸磐石有輔長幼之倫旣正本支之傳益隆在祖宗列聖在天

之靈豈不燕喜且使內而六宮外而百官遠而四海九州六軍萬姓無不歡欣踊躍其以慰安人心
幹旋天意豈曰小補而已臣等職在輔弼國家休戚同之故敢不避煩瀆輒效其愚伏望皇上俯察
邇言蚤定大計將冊立冊封吉典及時舉行不勝幸甚十八年正月朔日上在毓德宮召閣臣申時
行許國王錫爵王家屏四臣於西室御榻東向時行等西向跪致詞云元旦新春仰惟皇上萬壽萬
福臣等不勝欣賀時行等又云冊立東宮係宗社大計伏望皇上早賜裁定上曰朕知之朕無嫡子
長幼自有定序鄭妃亦再三陳請恐外間有疑但長子猶弱欲俟其壯健使出纔放心時行等又云
皇長子年已九齡蒙養豫教正在今日宜令出閣讀書上曰朕已知之先生每回閣去罷各賜酒飯
一棹燒割一分時行等叩頭謝遂出行去宮門數十丈許上復令司禮內臣追止之云且少候丁巳
令人宣長哥來著先生每一見時行等復還至宮門內立待良久上令內臣覘視申閣老等聞召長
哥亦喜否時行等語內臣云我等得見睿容便如觀景星慶雲真是不勝之喜內臣入奏上微哂頷
之久之司禮內監傳言皇長子至矣皇三子亦至但不能離乳保遂復引入西室至御榻前則皇長
子在榻右上手攜之皇三子傍立一乳母擁其後時行等既見因賀云皇長子龍姿鳳目岐嶷非凡

仰見皇上昌後之仁齊天之福上欣然曰此祖宗德澤聖母恩庇朕何敢當時行等奏皇長子春秋漸長正當讀書進學上曰已令內侍授書誦讀矣時行云皇上正位東宮時方六齡卽已讀書皇長子讀書已晚矣上曰朕五歲卽能讀書復指皇三子是兒亦五歲尙不能離乳母且數病時行等稍前熟視皇長子上手引皇長子向明正立時行等注視良久因奏云皇上有此美玉何不早加琢磨使之成器願皇上早定大計宗社幸甚九月詔停刑閣臣合疏請止開礦十月兩京九卿科道合辭懇請冊立東宮皇貴妃親弟鄭國泰特疏敦請聖諭云朕昨覽卿等所奏揭帖固是但皇子體脆質弱再少俟時日朕自有旨其於長幼之序豈有搖動便於明年冬傳旨冊立如再瀆擾直待十五歲冊立欽此十一月兵部題請邊務久廢閣視當嚴九邊宜各差科臣一員上自八月以來久未視朝羣臣請於十九日恭遇聖母萬壽之辰幸出臨受賀二十一年正月閣臣王錫爵謹瀝密誠請立東宮疏奉聖諭朕雖去歲有旨今春行冊立之典昨讀皇明祖訓內一條立嫡不立庶之訓況今皇后年齒尙少倘後有出冊東宮乎封王乎欲封王是背違祖訓欲立東宮是二東宮也故朕遲疑未決旣卿奏來朕今欲將三皇子俱暫一併封王少待數年皇后無出再行冊立庶上不背違祖訓下於

事體兩便卿可與朕作一諭旨來行光祿寺寺丞朱維京刑科給事中王如堅各疏請冊立上怒甚革職謫戍閣臣王錫爵特疏懇救有旨免戍二月閣臣請會議冊典不允復請面陳冊儲事體不報閣臣王錫爵請定冊典以信初詔十二月閣臣王錫爵等請皇長子先行冠禮疏奉聖諭朕意亦應皇長子出閣未行冠禮朕查大明典禮東宮與王褒冕皮弁二服冠則皆同其服則異今欲行冠禮儀從何行朕意欲暫著常服出講待冊立後再行加冠禮未遲欽此二十九年冬冊立元子爲皇太子時冠婚並舉翰林院檢討沈灌撰元良頌冊封福王瑞王惠王桂王恭上聖母慈聖宣文明肅貞壽端獻皇太后徽號羣臣奉表稱賀存問在籍閣臣申時行勅曰卿等贊襄密勿輔朕有年前屢有疏揭勸朕冊立朕志已定待期舉行但因賣直沽名之輩屢來激聒故從延緩知卿等忠言至計尙鬱於懷今元子氣體充盈學業精進已冊立皇太子冠婚並舉暨諸子封爲福王瑞王惠王桂王率文武百官奉冊寶加上聖母尊號曰慈聖宣文明肅貞壽端獻皇太后國本已定慶溢宮庭念卿等家居係心良切茲遣官齎勅存問仍令該布政司官辦備羊酒花銀五十兩綵段四表裏一同持送以示優眷卿其加餐自愛特諭知之三十年三月在籍閣臣王錫爵謝存問疏曰茲者伏遇皇上以

冊立冊封禮成加上聖母徽號因降勅諭遣刑部員外王玠齋至臣籍存問恩賜寵渥臣謹望闕恭謝外伏念往年儲宮議起雖嘗從同官反覆疏揭不過卽皇上長幼定序一語次第數陳臣等原無更端自出之見可市爲名者旣蒙屢旨渙頒吉期可待臣等又原無有餘不盡之忠鬱而未伸者今日之舉如天之清如日之明又如震雷一發而萬疑萬謗渙然冰釋以臣之愚越在草野但有傾耳下風伏膺明信已耳其他尙何容贊一詞獻一曝而以勤九重萬里遺簪棄履之思金莖玉露之賜乎伏惟天地之恩非草木可酬腹心之感非披瀝能盡臣之所願皇上弘錫孝類大庇恩覃推不遺舊臣之心因并推舊臣感恩圖報之心凡事爲狂愚激聒有所欲行欲罷而未果者一切示人以日月之明四時之信則臣區區私祝之忱也四十八年七月聖諭內閣朕嗣祖宗大統歷今四十八年久因國事焦勞以致脾疾遽不能起有負先帝付託惟皇太子青宮有年實賴卿與司禮監協心輔佐遵守祖宗保固皇圖卿功在社稷萬世不泯二十一日酉時上崩遺詔曰朕以冲齡繼承大統君臨海內四十八載於茲享國最長夫復何憾念朕嗣服之初兢兢化理期無負先帝付託比緣多病靜攝有年郊廟弗躬朝講稀御封章多滯僚案半空以礦稅繁興征調四出民生日促邊釁漸開夙